

# Bisnes

bhbiz@bh.com.my

# Kenaikan harga minyak tingkat pendapatan negara

Kerajaan berpeluang berbelanja, sasar defisit fiskal lebih baik tahun depan

Oleh Mohd Zaky Zainuddin  
zaky@bh.com.my

**Kenaikan** harga minyak dunia memberi limpahan kepada pendapatan negara dan dijangka menyumbang hasil petroleum sehingga 30.9 peratus tahun ini.

Ketua Ekonomi Bank Islam Malaysia Bhd, Dr Mohd Afzanizam Abdul Rashid, berkata jika kenaikan harga minyak dunia berterusan, ia akan memberi ruang kepada kerajaan untuk berbelanja dan menyasarkan defisit fiskal yang lebih baik pada tahun depan.

"Pilihan yang ada adalah untuk berbelanja lebih ke arah perbelanjaan pembangunan yang bersifat jangka panjang. Kerajaan berkemampuan untuk berbelanja lebih kepada subsidi atau bayaran pindahan, yang mana ia juga penting bagi tempoh jangka pendek.

"Justeru, kerajaan perlu mengimbangi kedua-dua keperluan iaitu jangka panjang serta pendek," katanya kepada

da BH.

Pengurus Pembangunan Perniagaan Putra Business School (PBS), Prof Madya Dr Ahmed Razman Abdul Latiff, pula berkata setiap kenaikan harga minyak sebanyak AS\$1 satu tong menyaksikan kerajaan akan meraih pendapatan tambahan sebanyak RM300 juta.

Katanya, peluang itu patut diambil sepenuhnya dengan meningkatkan jumlah pengeluaran minyak meskipun kenaikan itu mungkin bersifat sementara, bergantung kepada secepat mana kerajaan Arab Saudi mampu memulihkan keadaan dengan membaiki kemudahan yang rosak teruk.

"Ia mungkin mengambil

masa berminggu-minggu malahan beberapa bulan," katanya.

Dr Ahmed Razman berkata, kenaikan harga minyak mentah turut memberi kesan positif kepada ringgit, di mana mata wang tempatan itu mungkin mengukuh sedikit, namun kesannya agak minimum kerana masih terlalu awal untuk meramalkan pergerakannya berbanding dolar Amerika Syarikat (AS) selain dipengaruhi oleh faktor lain.

"Ada kemungkinan harga petroleum domestik akan naik tetapi tidak terlalu drastik kerana kerajaan boleh mengambil keputusan untuk menaikkan kadar subsidi ke atas petroleum.

Lihat muka 26

**Pilihan yang ada adalah untuk berbelanja lebih ke arah perbelanjaan pembangunan yang bersifat jangka panjang.**

Mohd Afzanizam Abdul Rashid,  
Ketua Ekonomi Bank Islam Malaysia Bhd



Khazanah jual 100 peratus kepentingan dalam Prince Court  
Muka 27



Jualan PROTON catat pertumbuhan 36.5 peratus  
Muka 62



# Peningkatan harga minyak bersifat sementara

Dari muka 25

"Kerajaan juga mungkin tidak perlu mengapungkan harga petrol dan diesel kerana peristiwa ini (kenaikan harga minyak global) tidak akan berlarutan dengan lama dan rakyat juga masih lagi bergelut dengan kos sara hidup yang tinggi," katanya.

Sementara itu, penganalisis ekonomi, Dr Aimi Zulhazmi Abdul Rashid, berkata buat masa ini perubahan harga minyak hanyalah bersifat sementara dan kenaikan itu sebahagian daripada tindak balas, dengan pasaran akan kembali stabil kerana masih banyak bekalan dari alternatif lain seperti minyak syal di AS.

"Saya menjangkakan bekalan juga akan ditambah oleh Russia untuk kembali menstabilkan harga. Harga akan kembali normal dalam masa satu atau dua minggu," katanya.

Niaga hadapan awal minggu ini melonjak 10 peratus susulan serangan ke atas kemudahan pemprosesan minyak mentah Arab Saudi yang menjejaskan separuh daripada pengeluarannya.

Harga pada mulanya melonjak lebih 20 peratus selepas dibuka pada petang Ahad, dengan minyak mentah Brent mencatatkan kenaikan harian terbesar sejak krisis Teluk pada 1990-1991.

Niaga hadapan Brent menokok kepada AS\$71.95 satu tong pada Isnin, kenaikan harian terbesar sejak 14 Januari 1991.

